

«Cun l'arma al pe»

La Partida burgais-democratica sa fatschenta cun visiuns en atgna chaussa

DAD ANDREAS CADONAU / FMR

■ **Proximamain sa fatschenta la radunanza da la Partida burgais-democratica cun perspectivas futuras elavuradas dad ina grupp da giuvens activists. Ils exponents regional da la pbd na vulan betg valitar ils scenaris futurs, anc betg.** *Daniel Buchli*, selvicultur da la vischnanca da Stussavgia e deputà dal cussegl grond è president da la pbd da la Surselva. Per ina pitschna grupp ha el definì sia secziun, probabel la pli pitschna tranter las secziuns chantunales da la pbd s'establida istoricamain en las vischnancas reformadas sursilvanas. La Surselva è dentant il revier da la Partida cristiandemocratica. La discussiun davart l'avegnir da la pbd, instradada suenter las elecziuns naziunales da l'atun passà, ha Buchli commentà cun in surrir: «Nus stain momentan cun l'arma al pe.» S'exprimer davart l'avegnir da sia secziun na vul Buchli betg avant che la partida chantunala ed eventualmain era la part naziunala hajan preschentà e discutà opziuns. Opziuns skizzadas curt da Benno Niggli, il president da la pbd grischuna, a chaschun dal apero da Bumaun. Las variantas: Cuntinuar sco fin uss, maridar u schliar. La varianta schliar ha Niggli gia valità l'entschatta da l'onn per pauc realistica. Ed il pled schliar vul era la presidenta da la pbd da l'Engiadin'Auta, la deputada *Heidi Clalüna*, betg prender en bucca. Bler temp per politica nun ha la cunpossessura da la vituraria Clalüna a durant la stagiun turistica. Ella ha ditg da vulair discutir las opziuns preschentadas da la partida chantunala l'entschatta favrer cun ils exponents da la partida locala.

Cuntinuar sco enfin ussa

Sia preferenza persunala ha Clalüna alura tuttina anc tradì envers la FMR. Ella sa cloma: cuntinuar. Sia secziun da la pbd sa chattia en in spazi dominà da la Partida liberaldemocratica. Tar la midada d'avant intgins onns da la Partida popu-



Trais umens en missiun da la partida: Il schef da fracziun Gian Michael, il president Benno Niggli ed il cusseglier guvernativ Jon Domenic Parolini.

FOTO SOMEDIA

lara tar la pbd hajan blers exponents da la pps d'antruras fatg il pass tar la pbd. Pers electurs ha la pbd da l'Engiadin'Auta tuttina ils onns passads. Clalüna vesa la necessitad da motivar persunas giuvnas da s'engaschar en la politica e per la pbd.

In basegn che Buchli vesa pli probabel sumegliant. Per el è politica la fin finala servetsch a favur da la publicitad. Buchli ha pledentà las midadas entaifer la societad che pertutgan er ils anteriurs fundaments, tant da sia partida sco quella da la pcd. Uschia valitescha el la discussiun davart l'avegnir da sia partida per necessaria.

Spetgar è medemamain la devisa dal president da la Partida burgais-democratica da la citad da Cuira, *Dajan Roman*. Spetgar sin las explicaziuns dal timun chantunal. Quai na veglia dentant betg dir ch'ins n'haja betg fatg ponderaziuns davart las perspectives politicas da la pbd

da la citad da Cuira, ha accentuà Roman. Per in'emprima avischinaziun a la pcd na vul el dentant betg avair definì il sustegn da la pbd per la candidata da la pcd *Sandra Maissen* en las elecziuns dal cussegl da la citad da Cuira.

Sustegnair la dunna da la pcd

Il president da la pbd da Cuira ha regurdà a la comunicaziun en chaussa. Ed a la constataziun ch'i saja temp da plazar ina dunna en l'executiva da la chapitala grischuna. Roman ha discurrì da la finamira da cuntanscher ina maiortad burgaisa en il cussegl che sa cumpo- na da trais persunas. Era cun agid da la pld che sustegn medemamain la candidatura Maissen sper ses candidat ed actual president da la citad, *Urs Marti*. Roman vesa pitschnas differenzas politicas tranter las forzas burgaisas entaifer

la citad da Cuira, respectiv tranter pbd, pcd e pld. E concentrar quellas forzas è ord sia vista persunala senz'auter in'opziun.

La decisiun davart l'avegnir politic giaschia la fin finala tar mintga singul commember. Era sch'in'eventuala uniun cun la Partida populara da la citad da Cuira saja opportuna. Roman vesa dentant la gronda maiortad da l'agen commembradi cun ina tenuta burgaisa attaschada a la politica dal center.

Ina resposta indirecta vers ina collaboraziun burgaisa è vegnida da la pps da Cuira sezza. Ella na sustegn numnadamain betg la candidatura da la pcd e vegn cun in'atgna candidata ubain agen candidat. Roman da sia vart ha sentì ina gronda motivaziun dal commembradi da la pbd da Cuira da s'engaschar per las elecziuns dal parlament da la citad la stad proxima.